

Your Helpful Friend - Tagalog

# Ang Tyong Matulunging Kaibigan

1



IKAW AY MAY KAIBIGAN—ANG ESPIRITU SANTO

## Mahal na Kaibigan

Nagagalak kami na ikaw ay kabilang sa malaking talaan ng mga nag-aaral sa International Correspondence Institute! Sa kursong ito'y kasama mo ang libu-libong estudyante sa maraming bansa na nagnanais na lalong makilala ang Diyos. Masusumpungan mo ang lalong mali-gayang buhay habang isinasagawa mo ang iyong natutuhan sa anim na araling ito.

Ikaw ay May Kaibigan - Ang Espiritu Santo  
Ang Espiritu Santo ay Magbibigay sa Iyo ng Buhay  
Tutulungan Kang Manalangin ng Espiritu  
Papatnubayan Ka ng Espiritu Santo  
Bibigyan Ka ng Kapangyarihan ng Espiritu  
Pupuspendin Ka ng Espiritu Santo

Mababasa mo ang nakawiwiling karanasan ng mga taong tumanggap kamakailan sa Espiritu Santo bilang Kaibigan at Katulong. At matututuhan mo sa Biblia kung ano ang gagawin para sa iyo ng Kaibigang ito.

Alam mo na marahil na maraming salin ng Biblia. Ginagamit sa mga araling ito ang Lumang Tipan at ang Bagong Tipan. Kalakip ng bawat talata sa Biblia ang aklat, kabanata, at bilang ng talatang pinagkunan. Kung minsan, ito'y bahagi lamang ng talata.

Pagkatapos mo ng araling ito, sagutin lang ang eksamen. Pag nasagot mo na ang eksamen, ipadala sa INTERNATIONAL CORRESPONDENCE INSTITUTE, P.O. Box 1084, Maynila. Matapos lagyan ng antas ibabalik namin sa iyo ang eksamen pati ang susunod na araling walang bayad.

Kung matapos mo ang anim na aralin sa paksang ito, tatanggap ka ng magandang katibayan.

Kung ikaw ay may patotoo kung paano nakatutulong sa iyo ang kursong ito sa paghahanap ng tugon sa maraming katanungan sa buhay o kaya'y anumang kahalilingan sa panalangin, ilakip ito sa susunod mong sulat. Ikagalak na lagi ng ICI staff na makabalita buhat sa iyo. Tinatanggap namin ang anumang pagkakataong makapagpayo sa iyo.

Director.

## Aralin I

### IKAW AY MAY KAIBIGAN —ANG ESPIRITU SANTO

#### Sa Araling Ito'y Pag-aaralan Mo

- Siya'y Tanging Kaibigan
- Siya'y Tutulong Sa Iyo
- Siya'y Magtuturo Sa Iyo
- Gagawin Niyang Tunay Ang Dios Sa Iyo
- Pupuspusin Niya ng Pag-ibig ang Buhay Mo

#### SIYA'Y TANGING KAIBIGAN

Tinanong ang isang dakilang lalaki kung ano ang lihim ng kanyang tagumpay. Siya'y sumagot: "May kaibigan ako." Ibig niyang malaman ng lahat na kung di dahil sa tulong ng kanyang kaibigan, marahil ay bigo siya. Tinulungan siya, pinalakas ang loob niya, at hindi siya iniwan ng kanyang kaibigan. Ang kaibigang ito'y nagmahal at nagtiwala sa kanya, anupa't naging makabuluhan ang kanyang buhay. Ikaw ba'y nagtataglay ng gayong kaibigan? Siya'y kailangan mo.

Anong uri ng kaibigan ang nais mo? Di kasi, yaong magmamahal sa iyo, magmamalasakit sa iyo at sa mga suliranin mo at makikibahagi sa katuwaan mo. Ibig mong siya'y laging magtatapat sa iyo, na sasabihin sa iyo ang katotohanan kahi't na masakit, ituturo ang mga kakulangan mo nguni't sa layuning matulungan ka.



**Marahil, nais mong ang iyong kaibigan ay maging higit na matalino, higit na malakas, at higit na mabuti kaysa iyo. Sa gayon, matuturuan at matutulungan ka niya sa tuwina. Sasagutin niya ang mga katanungan mo. Tutulungan ka niya sa mga suliranin mo. At habang tumatagal ang inyong pagsasama, lalo mo siyang nakakatulad - ikaw ay magiging higit na malakas, higit na matalino at higit na mabuti kaysa ngayon.**

**Si Jesu-Cristo ay naging ganitong uri ng kaibigan kina Pedro, Santiago, Juan, at sa iba pang mga alagad. Kaibigan Siya ng maysakit at pinagaling Niya ang kanilang karamdaman. Kaibigan Siya ng mga makasalanan. Pinatawad Niya sila at binigyan ng bagong buhay. Nakipagkaibigan Siya sa lahat ng may nais**



**makipagkaibigan sa Kanya: mayaman o dukha, makasalanan o banal, nag-aral o hindi, kahit anong lahi o bansa. Ipinadama Niya ang pag-ibig na higit na dakila kaysa naranasan na nila -- ang pag-ibig ng Dios. Itinuro Niya sa kanila ang katotohanan. Tinulungan Niya sila sa mga suliraning kinakaharap nila.**

**Subali't si Jesus, sa Kanyang katawang pisikal ay maaari lamang manatili sa isang dako sa isang panahon. Kaya't sinabi ni Jesus sa mga alagad na babalik Siya sa langit at magpapadala ng ibang Kaibigan at Katulong na makakasama nilang lahat sa lahat ng oras, saanman sila naroon.**

Juan 14:16-17. "At Ako'y dadalangin sa Ama, at kayo'y bibigyan Niya ng ibang Mang-aaliw, upang Siyang suma-inyo magpakailanman, ang Espiritu ng katotohanan: na hindi matatanggap ng sanlibutan: sapagka't hindi nito Siya nakikita, ni nakikilala man Siya: Siya'y nakikilala ninyo; sapagka't Siya'y tumatahan sa inyo, at sasa inyo."

Juan 16:7. "Nararapat sa inyo na Ako'y yumaon; sapagka't kung hindi Ako yayaon, ang Mang-aaliw ay hindi paririto sa inyo: nguni't kung Ako'y yumaon, Siya'y susuguin Ko sa inyo."

Ang Katulong na ipinangako ni Jesus ay ang Espiritu Santo, ang Pangatlong Persona sa Trinidad.



Siya'y kalikas ng Dios Ama at ni Jesu-Cristo, ang Dios Anak, pati sa kapangyarihan at layon. Alam Niya ang lahat at nasa lahat ng dako sa lahat ng oras. Sinugo ni Jesus ang Espiritu Santo upang Siyang manahanan sa buhay ng mga

tumanggap sa Kanya. Gagawin Niya para sa iyo ang ginawa ni Jesus para sa mga alagad.

Nadarama mo ba kung minsan na walang nakauunawa o nagmamalasakit sa mga suliranin mo? Mayroon! Ang Dios. Alam Niya kung ano ang kailangan mo. Mahal ka Niya kaya't sinugo ang Espiritu Santo upang maging iyong tanging Kaibigan at Katulong. Matututuhan mo sa kursong ito kung paano dumating ang Espiritu Santo, ano ang Kanyang ginawa para sa mga unang Cristiano, at ano ang gagawin Niya para sa iyo. Kung ang Espiritu Santo ay Kaibigan mo, hindi ka na dapat malungkot o manlupaypay.



### Gawin Mo Ito


1. Ibig mo bang maging Kaibigan at Katulong ang Espiritu Santo? ...
2. Ibig mo bang makilalang lalo ang Espiritu Santo? .....
3. Pag-isipan kung paano ka natulungan ng mga kaibigan mo. Pagkatapos, isipin ang ginawa ni Jesus para sa mga tao at ang magagawa ng Espiritu Santo para sa iyo.
4. Isaulo ang Juan 14:16, 17.

## SIYA'Y TUTULONG SA IYO

Si Jesus ay nangakong magsusugo ng Ibang Katulong. Ang salitang ginamit Niya sa Griego ay "paraclete", na isinasaling Mang-aaliw. Ibig sabihin, "isang tinawag upang tumulong." Ang iba pang tawag sa "Paraclete" ay nagbabadya ng Kanyang kapangyarihan, pananagutan, at paraan ng pagtulong. Tinatawag Siyang Espiritu ng buhay, Espiritu Santo, Espiritu ng katotohanan, Espiritu ng karunungan, Espiritu ni Cristo, at Espiritu ng Dios. Anuman ang suliranin mo may laang kalutasan ang iyong Katulong.

### Ang Espiritu ng buhay

Kailangan mo ba ang pagpapagaling sa iyong katawan? Sa buong daigdig maraming maysakit ngayon ang mahimalang gumagaling bilang tugon sa panalangin. Muling akaririnig ang bingi, nakakakita ang bulag,



nakalalakad na muli ang paralisado o lumpo, dahil sa kapangyarihan ng Espiritu Santo. Siya ang Espiritu ng buhay na nagbibigay-buhay sa lahat ng nilikha. Sa pamamagitan ni Jesus ay nagpagaling Siya at hanggang ngayon ay nagpapagaling pa rin Siya ng mga may karamdaman.

Sa susunod na aralin, lalo mo pang matututuhan kung paano nagbibigay sa iyo ng buhay at kalusugan ang Espiritu Santo upang magkaroon ka ng magalak at nakasisiyang buhay sa lupa, at maluwalhating buhay sa hinaharap. Subali't dapat kang paakay sa Espiritu upang malasap mo ang buhay na kaloob Niya.

Roma 8:5, 6. "Sapagka't ang mga ayon sa laman ay nangagsisitalima sa mga bagay ng laman; datapuwa't ang mga ayon sa Espiritu ay sa mga bagay ng Espiritu; Sapagka't ang kaisipan ng laman ay kamatayan; datapuwa't ang kaisipan ng Espiritu ay buhay at kapayapaan".

## Gawin Mo Ito

5. Ibigay ang pitong tawag sa Espiritu Santo:

.....  
.....  
.....  
.....  
.....

6. Basahing makalimang ulit ang Roma 8:5, 6.

## Ang Espiritu Santo

Nahihirapan ka bang mamuhay nang matuwid? Ibig mo bang maging lalong mabuting Cristiano? Ang Katulong mo'y ang Espiritu Santo, o Espiritu ng kabanalan. Ang ibig sabihin ng "Santo" ay "hiwalay sa kasalanan at nakalaan sa Dios." Ipinakikita sa atin ng Espiritu Santo na nakaririmarim ang ating kasalanan at tinutulungan tayong alisin ito. Habang tayo'y napaiilalim sa Kanya, ilalapit naman Niya tayo sa Dios at ilalayo sa kasalanan ng kapalaluan, karamutan, katigasan ng ulo, pagka-magagalitin, pagkaawa sa sarili, paghihimagsik, pagkagahaman, at likong isipan o kilos.

Marahil, kailangan mo ang tulong upang maalis ang ilang di mainam na pag-uugali. Kung ikaw ay Cristiano, ang iyong katawan ay templo ng Espiritu Santo. Tutulungan ka Niyang alisin ang anumang pag-uugaling makasasama sa iyong katawan.

Maraming kabataang sugapa sa apyan ang pinalaya ng Espiritu Santo. Pansamantalang ginhawa lamang ang naibigay sa kanila ng medisina at kawanggawa. Bilang huling hakbang, bumaling sila sa Dios. Matapos tanggapin si Jesus bilang Tagapagligtas, hiniling nila sa Espiritu Santo na puspusin sila at palakasin upang makapamuhay para sa Dios. Nang mapuspos sila ng Espiritu, pinalaya sila ng Espiritu muisa sa pagkaalipin sa apyan. Pinuspos sila ng pag-ibig ng Dios at ng pagnanasang makatulong sa kapuwa. Marami sa kanila ngayon ang nangangaral ng Ebanghelyo. Malinis na ang kanilang buhay sapagka't nasa kanila ang Espiritu ng kabanalan.



I Pedro 1:2. "Hinirang kayo ayon sa malaon nang ipinasiya ng Diyos Ama, at binanal kayo ng Espiritu Santo."

### Gawin Mo Ito

7. May mga kasalanan ka ba o masasamang pag-uugaling nais mong maalis sa tulong ng Espiritu Santo?  
Isulat ang mga ito sa paraang ikaw at Siya lamang ang makababasa. Hingin sa Kanya na palayain ka sa mga ito.

## SIYA'Y MAGTUTURO SA IYO

### Ang Espiritu ng katotohanan

Kung paanong tinuruan ni Jesus ang mga alagad at sinagot ang kanilang mga tanong, gayon ka rin tuturuan ng Espiritu Santo.



Tutugunin Niya ang mga tanong mo tungkol sa Dios. Ipakikita Niya sa iyo ang layon ng buhay. Ipaunawa Niya sa iyo ang Biblia. Biglang lilinaw ang

mga bagay na nakagugulo sa iyo noong araw. Ang wika ni Jesus:

Juan 16:13. "Kung Siya, ang Espiritu ng katotohanan ay dumating, ay papatnubayan Niya kayo sa buong katotohanan."

Kamakailan, tumanggap ng Espiritu Santo ang ilang nag-aaral sa seminaryo. Biglang "nagkabuhay" sa



kanila ang katotohanan ng Biblia. Namangha ang mga guro sa kanilang bagong pagkaunawa sa mga bagay na espirituwal. Dumating na ang Espiritu ng katotohanan.



## Gawin Mo Ito

8. Isaulo ang Juan 16:13.
9. Ibig mo bang turuan ka ng Espiritu ng katotohanan?.....

## Ang Espiritu ng karunungan

Pinag-iisipan mo ba kung ano ang nararapat mong gawin o kung paano mo lulutasin ang iyong mga suliranin? Narito ang Espiritu ng karunungan upang tumulong sa iyo. Aakayin ka Niya at ipakikita sa iyo ang pinakamabuti. Sa aralin 4 ay pag-aaralan mo kung paano Niya ginagawa ito.

Nais mo ba ng karunungan upang maipaglingkod sa Dios? Sa aklat ng Mga Gawa, makikita mong napuspos muna ng Espiritu Santo ang mga diakono bago sila nakapaglingkod. Marahil, ikaw'y nagtuturo sa Paaralang



Panlinggo, nanghihikayat ng mga kaluluwa, o nangangaral. Nais kang puspusin ng Espiritu ng karunungan at tulungan, gaya ng ginawa Niya sa mga manggagawa ng unang iglesya.

Mga Gawa 6:10 “At hindi sila makalaban sa karunungan at sa Espiritu na kanyang ipinangungusap.”

## Gawin Mo Ito


10. Kailangan mo bang mapuspos ng Espiritu ng karunungan? .....  
Bakit? .....  
.....

# GAGAWIN NIYANG TUNAY ANG DIOS SA IYO

## Ang Espiritu ng Dios

**DIOS**


Tunay ba sa iyo ang Dios? O napakalayo Niyang Pinuno kaya't tinatawagan mo lamang kung napakabigat ng iyong suliranin? O Siya'y Amang sumasalangit na nagmamalasakit sa pinakamaliit na bagay sa buhay mo? Nananalangin ka ba sapagka't ito'y tungkulin? O tapatan mong kinakausap ang iyong Ama? Naparito ang Espiritu ng Dios upang tulungan kang makilalang higit ang Dios.



1 Corinto 2:10-12. "Nguni't ang mga ito ay ipinahayag sa atin ng Dios sa pamamagitan ng Espiritu; sapagka't nasisiyasat ng Espiritu ang lahat ng mga bagay, oo ang malalalim na mga bagay ng Dios .... ang mga bagay ng Dios ay hindi nakikilala ng sinuman, maliban na ng Espiritu ng Dios .... nguni't ating tinanggap ... ang Espiritung mula sa Dios upang ating mapagkilala ang mga bagay na sa atin ay ibinigay na walang bayad ng Dios."

Ang iyong guro ay mananalangin para sa iyo gaya ng idinalangin ni Pablo para sa mga Cristiano sa Efeso:

Efeso 1:17-19. "Upang ipagkaloob sa inyo ng Dios ng ating Panginoong Jesu-Cristo, ang Ama ng kaluwalhatian, ang Espiritu ng karunungan, at ng pahayag sa pagkakilala sa Kanya; yamang naliwanagan ang mga mata ng inyong puso, upang maalaman ninyo kung ano ang pag-asa sa Kanyang pagtawag; kung ano ang mga kayamanan ng kaluwalhatian ng Kanyang pamana sa mga banal, at kung ano ang dakilang kalakhan ng Kanyang kapangyarihan sa ating nagsisisampalataya."



### Gawin Mo Ito

11. Basahing makalimang ulit ang Efeso 1:17-19. Angkinin mo ang dalanging ito, at ipatungkol din sa iba.

## Ang Espiritu ni Cristo

Si Jesus ay pinatunayan sa iyo ng Espiritu Santo, ang Espiritu ni Cristo, nang ikaw ay Kanyang iligtas. Ipinaalam Niya sa iyo na si Jesus ay higit pa sa isang dakilang Gurong nabuhay noong araw. Ipinakilala Niya si Jesus bilang Anak ng Dios at tinulungan kang Siya'y tanggapin bilang iyong Tagapagligtas, Panginoon, at walang hanggang Hari. Iniugnay ka Niya kay Cristo at ginawa kang sangkap ng Kanyang katawan, ang Iglesya. Tunay na tunay ang kaugnayang ito anupa't nabubuhay sa iyo si Cristo sa pamamagitan ng Kanyang Espiritu.

Kasama ng mga tagasunod ni Jesus ang Espiritu Santo bago dumating ang Araw ng Pentecostes, nguni't ipinangako ni Jesus na Siya'y darating sa bagong paraan at sila'y pupuspusin. Babautismuhan sila ni Jesus ng Espiritu Santo. Pagkatapos na sila'y nabautismuhan, tinuruan sila ng Espiritu Santo ng dagdag na mga bagay tungkol kay Jesus at pinalakas sila upang maipangaral si Cristo.



Sa ganyan ding paraan ngayon, lahat ng ipinanganak na muli ay taglay ang Espiritu ni Cristo. Nguni't nais ni Jesus na sila'y bautismuhan ng Kanyang Espiritu upang higit na maging mabisang mga saksi Niya. Pag-aaralan mo pa ang tungkol dito sa mga susunod na aralin.

Juan 15:26; 16:14. "Datapuwa't pagparito ng Mang-aaliw na Aking susuguin sa inyo mula sa Ama, samakatuwid baga'y ang Espiritu ng katotohanan, na nagbubuhay sa Ama, ay Siyang nagpapatotoo sa Akin: Luluwalhatiin Niya Ako: sapagka't kukuha Siya sa nasa Akin, at sa inyo'y ipahahayag."

### Gawin Mo Ito

12. Nais mo bang gawing tunay sa iyo ng Espiritu Santo si Jesus? Kung gayon, hilingin mo sa Kanya.

## PUPUSPUSIN NIYA NG PAG-IBIG ANG BUHAY MO

Ang kailangang-kailangan ngayon ng sanlibutan ay pag-ibig na Dios lamang ang makapagbibigay. Gagamitin ka ng Dios sa pagtugon sa pangangailangang ito kung babayaan mong ikaw'y puspusin ng Espiritu Santo ng ganitong uri ng pag-ibig.

Sa panahon ng Lumang Tipan, ang Dios ay nakipag-usap sa mga propeta at ipinamalas sa kanila ang Kanyang pag-ibig. Kanila lamang sinabi sa mga tao ang tungkol sa pag-ibig na ito. Nguni't inakala pa rin ng marami na ang Dios ay isang mahigpit na Hukom na magpaparusa sa kanila. Hindi nila naunawaang sila'y nais iligtas ng Dios at gawing naga anak.

Sa wakas sinugo ng Dios ang Kanyang Anak na si Jesu-Cristo upang mamuhay sa piling ng mga tao at ituro ang tunay na likas ng Dios. Sa mga turo ni Jesus ay malalaman mong kahanga-hanga ang pag-ibig ng Dios sa mga tao. Ang pag-ibig na ito'y makikita mong kumikilos sa buhay ni Jesus. Makikita mo ang katibayan ng pag-ibig ng Dios sa kamatayan at pagkabuhay Niyang muli.


Nguni't ang naganap 2,000 taon na ngayong nakalilipas ay waring napakalayo na. Ang napapansin natin ay mga suliranin ngayon -- gutom, karahasan, krimen, digmaan -- at iniisip natin kung tunay ngang nagmamalasakit ang Dios. Kailangan nating makilala Siya nang sarilinan at maranasan nating tayo'y iniibig Niya.

Kaya nga naparito ang Espiritu Santo upang tulungan kang makipagharap sa Dios. Kung paanong naparito si Jesus upang ihayag ang pag-ibig ng Ama, naparito naman ang Espiritu Santo upang ihayag ang pag-ibig ng Ama at ng Anak. Puspusin ka Niya ng pag-ibig na hindi mo mailalarawan. Magsisimula ito sa sandaling ikaw ay mahikayat. Kapag nabautismuhan ka ng Espiritu Santo, waring higit ang kakayahan mong tumanggap ng kapuspusan ng pag-ibig ng Dios. At sa buong panahon ng buhay mo patuloy na aapaw ang pag-ibig ng Dios habang pinupuspos ka ng Espiritu Santo.

Roma 5:5. Ang pag-ibig ng Dios ay nabubuhos sa ating mga puso sa pamamagitan ng Espiritu Santo na ibinigay sa atin.

Pinupuspos ang buhay mo ng pag-ibig na may 5 - panig:

1. Iniibig ka ng Dios
2. Iniibig mo ang Dios
3. Iniibig ka ng ibang Cristiano
4. Iniibig mo ang ibang Cristiano
5. Iniibig mo ang lahat ng tao



Ganito ang paglalarawan ng mga taong puspos ng Espiritu:

“Nadama ko ang bautismo ng pag-ibig. Bigla akong nagkaroon ng malaking pag-ibig sa Dios at sa Kanyang Salita.”

“Ang Espiritu Santo ang nagkaloob sa akin ng bagong pag-ibig sa aking pamilya, mga kaibigan, ibang Cristiano, at pati mga kaaway ko.”

“Ang Kalbaryo ay naging tunay sa akin dahil sa Espiritu Santo. Natigib ako ng pasasalamat sa Dios. Bumalong ang malaking pag-ibig ko sa Dios at nasambit ko ang pagpupuri sa Kanya.”


“Napahagulgol ako ng panangis nang matigib ako ng pag-ibig ng Dios sa ibang kaluluwang napapahamak, at ang Espiritu Santo ang nanalangin sa pamamagitan ko para sa ikaliligtas nila.”

Kahawig ng karanasan ng unang iglesya ang mga karanasan sa ating kapanahunan: “Tingnan mo’t sila ay nagmamahalan!” Saan ka man magtungo, madarama mo ang pag-iibigan ng magkakapatid sa Panginoon, siyang puspos ng Espiritu. At malalasap mo ang buhay na higit na kasiya-siya kaysa anumang pinapangarap mo, habang pinupuspos ka ng pag-ibig ng Espiritu Santo.

## Gawin Mo Ito

13. Isaulo ang Roma 5:5.
14. Iguhit ang larawan ng pag-ibig na may limang panig, hanggang sa maisaulo mo ito.
15. Sa ibang papel nama'y isulat kung ano ang nais mong gawin para sa iyo ng Espiritu Santo. Ilagay ito sa iyong Biblia, kung ibig mo, bilang paalaala sa iyo upang manalangin at magpasalamat sa Dios sa mga tugon Niya.
16. Masasambit mo bang walang mali ang Juan 14:16, 17; Juan 16:13; Roma 5:5?  
.....
17. May Biblia ka ba? .....  
O kaya'y Bagong Tipan? .....  
Habang pinag-aaralan mo ang mga araling ito, bumasa ng kahit isang kabanata bawa't araw sa aklat ng Mga Gawa. Guhitan ang pangalan ng Espiritu Santo tuwing Siya'y nabanggit. Iuulat mo kung ilang ulit na nabanggit sa bawa't kabanata ang Espiritu Santo.
18. Basahin ang Juan 14, 15, 16. Ilang ulit binanggit ni Jesus sa bawa't kabanata ang pangalan ng Espiritu Santo?  
Kabanata 14 .... 15 .... 16
19. Ang iyong mga kaibigan ay maaari mong ipatala sa aming aralin na walang bayad, "Ang Mga Dakilang Katanungan Sa Buhay." Ipadala ang kanilang mga pangalan at tirahan.
20. Sagutin ang EKSAMEN at IPADALA SA ICI para malagyan ng antas.

P. O. Box 1084, Maynila



STUDENT NUMBER

# Ang Iyong Matulunging Kaibigan" EKSAMEN 1

Ikaw Ay May Kaibigan - Ang Espiritu Santo

PANGALAN \_\_\_\_\_ Petsa \_\_\_\_\_

TIRAHAN \_\_\_\_\_

Ibigay ang tamang sagot:

Gupitin at ibalik upang mabigyan ng antas

1. Anong uri ng kaibigan si Jesus?
  - a. Higit na matalino, higit na malakas, at higit na mabuti kaysa sa atin.
  - b. Matulungin kapag Siya'y ating tinulungan.
  - k. Tanging kaibigan ng mabuti, malusog at ma yaman lamang
2. Sino ang isinugo ni Jesus upang maging kaibigan ng lahat ng nangangailangan sa Kanya? (Juan 14:16)  
\_\_\_\_\_
3. Ibigay ang pitong tawag sa Espiritu Santo.
  - a. \_\_\_\_\_
  - b. \_\_\_\_\_
  - k. \_\_\_\_\_
  - d. \_\_\_\_\_
  - e. \_\_\_\_\_
  - g. \_\_\_\_\_
  - h. \_\_\_\_\_
4. Saan tayo papatnubayan ng Espiritu Santo na ating Guro? (Juan 16:13)  
\_\_\_\_\_
5. Nang bautismuhan ni Jesus ang Kanyang mga alagad ng Espiritu Santo, ano ang ginawa ng Espiritu Santo sa kanila? (Tingnan ang pahina 11.)
  - a. \_\_\_\_\_
  - b. \_\_\_\_\_

5. Isulat ang limang paraan sa pagpuspos ng Espiritu Santo ng pag-ibig sa buhay mo.

- a. \_\_\_\_\_
- b. \_\_\_\_\_
- k. \_\_\_\_\_
- d. \_\_\_\_\_
- e. \_\_\_\_\_

7. Ang karanasan ngayon ng bautismo sa Espiritu Santo ay kagaya ng nangyari sa

- \_\_\_\_\_ a. ibang relihiyon.
- \_\_\_\_\_ b. unang iglesya.
- \_\_\_\_\_ k. ibang denominasyong Cristiano.

Ang iyong pagsusulit ay lalagyan ng kaukulang antas at ibabalik sa iyo kalakip ang susunod na aralin. Ikagagalak naming tumanggap ng iyong personal na patotoo.

IPADALA ANG PAPEL NG PAGSUSULIT SA PINAKAMALAPIT NA TANGGAPAN NG ICI, GAYA NG NASUSULAT SA "SPECIAL MAILING INSTRUCTION." KAPAG WALANG NAKASULAT NA ADDRESS DOON, IPADALA ITO SA:

ICI – PHILIPPINE NATIONAL OFFICE  
P. O. BOX 1084, 1099 MANILA



## PAUNAWA

ANG IBA PANG CORSO NG  
ANG MGA SUMUSUNOD:

- \* Mga Tampok na Pangyayari sa Buhay ni Cristo
- \* Ang Iyong Bagong Buhay
- \* Ang Iyong Biblia
- \* Juan—Gabay sa Pag-aaral
- \* Ang Iglesya
- \* Ang Pag-aasawa at ang Tahanan
- \* Sino Si Jesus
- \* Mahal Ka ng Dios

Lahat ng kurso sa Biblia na handog ng ICI ay nagpapasigla at nagpapalakas sa buhay espirituwal.

Anyayahan ang mga kamag-aral o kasama sa opisina upang sila rin ay mag-aral sa mga handog na kurso ng ICI. Patulong sa Dios upang ikaw ay espirituwal na mamunga. Pagpalain ka ng Dios habang masigasig mong pinag-aaralan ang mga kursong ito.

Sumulat para sa karagdagang impormasyon:



INTERNATIONAL CORRESPONDENCE INSTITUTE  
P. O. BOX 1084, 1099 MANILA

# Ang Iyong Matulunging Kaibigan

## ARALIN

- 1 IKAW AY MAY KAIBIGAN  
—ANG ESPIRITU SANTO
- 2 ANG ESPIRITU SANTO AY  
NAGBIBIGAY SA IYO NG  
BUHAY
- 3 ANG ESPIRITU SANTO AY  
TUMUTULONG SA IYONG  
MANALANGIN
- 4 ANG ESPIRITU SANTO AY  
UMAAKAY SA IYO
- 5 ANG ESPIRITU SANTO AY  
NAGBIBIGAY SA IYO NG  
KAPANGYARIHAN
- 6 ANG ESPIRITU SANTO AY  
PUMUPUSPOS SA IYO



International Correspondence Institute  
Philippine National Office  
P. O. Box 1084  
1099 Manila